

文

選

旁

證

文選旁證卷第二

閩長樂梁章鉅撰

卷一下 東都賦

東都主人 後漢書無東都二字

矜夸館室 六臣本館室作宮館

注漢書田肯曰秦帶河阻山 六臣本田肯作婁敬胡公攷異

曰六臣本非也此所引高帝紀文非婁敬傳之秦地被山帶河也下注所云婁敬已見上文者謂見西都奉春建策注六

臣本蓋因下注致誤何陳皆據之改爲婁敬失之

夫大漢之開元也舊布衣以登皇位由數期而創萬代 後漢

書元作原位作極代作世

前聖靡得言焉 六臣本及後漢書得下並有而字

功有橫而當天討有逆而順民 六臣本功作攻討作計後漢
書亦作計注云高祖入關秦王子嬰降而五星聚於東井此
功有橫而當天逆謂以臣伐君高祖入關秦人爭獻牛酒此
爲計有逆而順人何曰二語言其不得已漢書注非
蕭公權宜而拓其制 六臣本拓作托後漢書而作以
監於太清以變子之惑志 後漢書于作乎惑作或
書契以來未之或紀 後漢書以作已紀下有也字
乃致命乎聖皇 後漢書無乃字乎作于

赫然發憤

又

霆擊昆陽

後漢書然作爾擊作發

注

爾雅曰疾雷爲霆

今爾雅作疾雷爲霆霓按說文霓爲屈

虹與霆無涉郭注雷之急擊者謂霹靂亦無霓字義攷初學
記一白氏六帖二北堂書鈔一百五十二事類賦三引皆無

體元與此同足訂今本爾雅之誤

體元立制

注

杜預左氏傳注曰凡人君卽位欲其體元以居正

何曰體元字乃杜注用班語不當引後注前按後漢書注亦同此正前序注所謂諸釋義或引後以明前也其實體元二字義當本易文言

專勤乎三五

注

史記曰孔子述三五之法今史記孔子世家

作述三王之法然本書劉越石勸進表三五以降注王元長山水詩序邁三五而不追注三國名臣贊三五迭隆注運命論仲尼見忌於子西注並引史記作三五之法與此同則今本史記誤也

贈一聖之險易云爾哉

六臣本爾下有而已二字

斯乃伏犧氏之所以基皇德也

白虎通號篇伏犧因夫婦正

五行始定人道

龔行天罰

注

尙書武王曰今予惟龔行天之罰

今書龔作恭

史記作共此注與後漢書注同三字並通姜氏臯曰說文龔給也玉篇奉也亦作供段氏玉裁曰龔行謂奉行也漢魏晉唐無不作龔者自衛包始改作恭耳

有殷宗中興之則焉

注

盤庚爲宗班之誤歟

殷三宗不數盤

庚故李注云然

不階尺土一人之柄

孫氏志祖曰一人當作一民避唐諱改

案注引孟子一人莫非其臣則人字不誤本書九錫文一人尺土朕無獲焉與此正同非李改明矣凡本書中如世作代民作人治作理皆避唐諱改亦有避改未盡致與他書參差無關考據者不悉具

眇古昔而論功 後漢書眇作妙注妙猶美也或作眇眇遠也而帝王之道備矣 後漢書無而字

至乎永平之際 六臣本及後漢書乎並作于

鋪鴻藻信景鑠 後漢書鋪作敷五臣信作申銑注可證後漢

書注亦讀曰申

正雅樂 後漢書雅作予注正予樂謂依讖文改大樂爲大予樂也困學紀聞十三云李善注亦引大予五臣本乃改爲雅耳孫氏志祖曰後漢書章帝紀有作登歌正雅樂之語此五臣所本顧氏千里曰困學紀聞論最確孫氏之說考諸章帝紀首永平十八年十二月癸巳有司奏言孝明皇帝作登歌正予樂章懷不注正予樂因已詳見上明帝紀永平三年故不須復見也今各本皆是予無作雅者不知孫氏何所據而

以爲五臣有本也

羣臣之序既肅 後漢書羣作君

注東觀漢記孝明詔曰璇璣鈴曰有帝漢出德洽作樂名雅會
明帝改其名郊廟樂曰大予樂正樂官曰大予樂官以應圖讖
名雅當作名予後漢書明帝紀注引亦作予會明帝三字
衍改其當作其改 四庫本東觀漢記可證正下當有大字
本書顏延年曲水詩序注可證

躬覽萬國之有無 五臣躬作窮翰注可證後漢書亦作窮姜
氏舉曰按羣經音辨卷三鞠窮容謹也窮音弓鄭康成說禮
鞠窮如也今本作弓蓋古聲借字若躬覽似宜作躬

考聲教之所被

注

尙書曰東漸於海西被於流沙朔南暨聲教

漢書賈捐之曰朔南暨聲教後漢書杜篤傳朔南暨聲諸

夏是和晉書地理志敘朔南暨聲教蓋尙書古讀皆以聲教
斷句武氏億謂史記禹本紀從暨字斷句胡氏渭亦曰裴駰
史記集解其注在暨字下則自劉宋時已不從孔傳而以聲
教屬下句證之本書薛綜注東京賦引書曰聲教訖於四海
斷句頗合然李注自以聲教斷句後注應吉甫詩引書同
弱巍巍顯翼翼 後漢書作翩翩巍巍顯顯翼翼

總八方而爲之極 六臣本無之字

於是皇城之內 六臣本及漢書於是並作是以

填流泉而爲沼

注

昭明諱順故改爲填

五臣填作順濟注可

證後漢書亦作順先通奉公曰梁書武帝紀武帝考諱順之
則昭明之祖也然下節順時節以蒐狩却又不改

制同乎梁鄒

後漢書鄒作騶王氏士正居易錄云鄒平縣漢

梁鄒地錢氏埭曰梁鄒在今鄒平縣北四十里孫家嶺

注毛詩傳曰古有梁鄒何校毛改魯是也各本皆誤後漢書

注及本書魏都賦注引並作魯詩可證

覽駟鐵五臣駟鐵作四駟銑注可證後漢書亦作駟

禮官整儀後漢書整作正

注薛綜西京賦註曰海中有大魚曰鯨海邊又有獸名蒲牢蒲

牢素畏鯨鯨魚擊蒲牢輒大鳴凡鐘欲令大聲者故作蒲牢於

上所以撞之者爲鯨魚鐘有篆刻之文故曰華也先通奉公

曰初學記鐘部引此文小有異同亦作西京賦薛綜注今西

京賦無此注東京賦發鯨魚鏗華鐘注只存華鐘謂有篆刻

文故言華也十一字想係李注刪以避複耳

登玉輅林先生曰漢無玉輅宋志禮論周玉輅最尊漢制乘

與金根車如周玉輅之制姜氏舉曰後漢書輿服志列玉輅於乘輿金根之前宋書禮志五引應劭漢官鹵簿圖乘輿大駕則御鳳皇車以金根爲副

乘時龍

注

周易曰時乘六龍

何曰後漢書注云爾雅曰馬高

八尺以上曰龍月令春駕蒼龍各隨四時之色故曰時也李

注引周易恐非本義

鳳蓋琴麗

後漢書琴麗作颯灑說文繫傳木部引作琴麗

注

說文曰琴大枝條

六臣本條下有琴灑也三字當亦說文

語今說文木部琴木枝條琴麗貌此誤木爲大耳

天官景從

注

百官小吏曰天官

張氏雲璈曰史記自敘學天

官於唐都注星有尊卑若人之官曹列位故曰天官又周禮

天官冢宰鄭目錄云象天所列之官釋曰周天三百六十餘

度天官亦總三百六十官故曰象天也賦言帝王之行百官
扈從必有天星拱衛與下文雨師風伯一例也

寢威盛容

注

寢威寢其威武也寢或爲褻五臣寢作褻翰注

褻盛也後漢書亦作褻注褻亦盛也義並與李注異尤本注
褻誤作侵

元戎竟野

余曰毛萇詩注元大也夏后氏曰鈞車先正也殷

曰寅車先疾也周曰元戎先良也

羽毛掃覽

後漢書覽作電

吐爛生風欲野歎山

後漢書爛作爛欲作吹歎作燎

申令三驅

後漢書申令作昌命向注三驅之法背以左右馳

者皆逐之向已捨之與李注引易義異余曰馬融易注三驅
者一曰乾豆二曰賓客三曰君庖按此說本穀梁傳後漢書

注已引之

輶車靈激

後漢書輶作輕激作發六臣本亦作輕

由基發射

後漢書由作游注游基養由基也按路史國名三

又稱繇基皆以音同通用又按養由基姓養見淮南子說山
訓注襄公十三年左氏傳稱養叔班孟堅幽通賦又單稱養
皆舉其姓此作由基則舉其名也若張茂先勵志詩及北史
楊播傳抱朴子知止篇並稱養由是誤以爲複姓矣蓋養爲
邑名其地見水經汝水注由基以邑爲氏其後乃有養由氏
而通志氏族畧因以養由氏爲養由基之後耳

范氏施御

注

吾爲範我馳驅

六臣本注作吾爲之範我馳驅

後漢書注引作吾爲范氏馳驅按孟子音義範我或作范氏
范氏古之善御者左傳范宣子曰昔句之祖在夏爲御龍氏

括地圖云夏德盛二龍降之禹使范氏御之以行經南方世稱善御爲范氏之御由此也此賦范氏李注前已引括地圖則後引孟子雖係注詭遇語而範我云云亦當用後漢書注所引之本方與賦語相應也宋書樂志君馬黃篇願爲范氏驅雍容步中畿豈效詭遇子馳騁趣危機亦用此事

弦不睨禽轡不詭遇 後漢書睨作失轡作轡說苑修文篇不抵禽不詭遇廣雅釋天不提禽不埓遇義並同毛詩車攻傳面傷不獻剪毛不獻正義面傷謂當面逆射之剪毛謂在旁而逆射之不獻者嫌誅降此亦不睨禽不詭遇之謂也

飛者未及翔走者未及去 六臣本兩未字作兩不字

注經南方 何校經改程據玉海所引也

注說文曰睨視也 今說文睨迎視也

士怒未漆翰注漆散也後漢書漆作泄注引方言曰泄歛也
姜氏舉曰漆集韻以爲灤除去也

注大駕車八十一乘 車上當有屬字後漢書注可證

觀明堂臨辟雍又登靈臺後漢書觀作御余曰楊街之洛陽

記平昌門直南大道東是明堂大道西是靈臺又曰漢宮闕
疏靈臺高三丈十二門天子曰靈臺諸侯曰觀臺

注永平三年正月 三當作二各本皆誤

注漢書詔曰投諸四裔 按此宜引左傳

東澹海濔後漢書注云前書威稜澹乎鄰國音義澹猶動也

南耀朱垠後漢書耀作超注超躍也

自孝武之所不征孝宣之所未臣 後漢書作自孝武所不能
征孝宣所不能臣林先生曰後漢書語殊失體當是昭明改

筆謹按濟注自孝武孝宣帝以來不能征討臣服者云云疑五臣本亦同後漢書也

綏哀牢開永昌 通鑑永平十二年春哀牢王柳貌內附置哀牢博南二縣永平十七年益州刺史朱輔宣漢威德遠夷自汶山以西白狼槃木等百餘國皆舉種稱臣注云益州郡犍爲牂柯永昌等郡

外綏百蠻 後漢書綏作接

爾乃盛禮興樂 後漢書無爾字興字

供帳置乎雲龍之庭 余曰戴延之記端門東有崇賢門次外有雲龍門

列金罍 林先生曰士冠禮疏金罍亦漢制黃香天子冠頌咸進爵平金罍又按漢書樂志朝賀置酒陳殿下匡衡傳亦云

朝賀置酒以饗萬方

布絲竹

又管絃煜煜

絲竹管絃四字蘭亭序連用爲人所嗤

野客叢書謂本之前漢張禹傳今此賦亦疊用矣

鐘鼓鏗鉤

後漢書鉤作鎗

注

一天子樂

何校天子改大予陳同是也各本皆誤後漢書

注引可證

韶武備

五臣武作舞翰注可證

注

左氏傳曰予曰

上曰字當作晏各本皆誤

僛侏毘離

後漢書僛作伶注周禮伶作禁侏作鞞毘作株也

毘離卽株離後漢書列女傳言毘離兮狀窈停注毘離匈奴

言語之貌又南蠻傳語言毘離蠻夷語其義一也

罔不具集

六臣本具作俱

注孝經鈎命決曰東夷之樂曰佻南夷之樂曰任西夷之樂曰
株離北夷之樂曰僛毛萇詩傳曰東夷之樂曰鞮南夷之樂曰
任西夷之樂曰朱離北夷之樂曰禁然說樂是一而字並不同
蓋古音有輕重也 本書魏都賦鞮佻任禁之曲注亦引鈎命
決佻作佻僛作禁毛詩鼓鐘傳任作南與此注異株離作朱
離與此注同禮記文王世子及明堂位正義引任亦作南云
南一名任詩鼓鐘正義云南者物懷任也以南訓任故或名
任其實一也明堂位正義引佻作佻文王世子正義引株離
作朱離周禮旄人及鞮鞻氏正義並引佻作鞮株離作佻離
按鞮師掌教鞮樂注舞之以東夷之舞則東夷之樂作鞮是
也詩鼓鐘正義云言佻者物生根也南者物懷任也秋物成
而離其根株冬物藏而禁閉于下故以爲名焉則作株離亦

是也惟明堂位正義載白虎通引樂元語曰東夷之樂曰朝
離萬物微離地而生樂持矛舞助時生也南夷樂曰南南任
也任養萬物樂持羽舞助時養也西夷樂曰昧昧也萬物
衰老取晦昧之義也樂持戟舞助時殺也北夷樂曰禁言物
禁藏樂持干舞助時藏也此與鉤命決東西夷之名互倒明
堂位正義云以春秋二方俱有味株離之異故白虎通及此
各舉其一韞韞氏正義又據虞傳云陽伯之樂舞侏離則東
夷之樂亦名侏離鄭注侏離舞曲名言象萬物生株離若詩
云彼黍離離是物生亦曰離太平御覽樂部五又引五經通
義曰東夷之樂曰侏離南夷之樂曰任西夷之樂曰禁北夷
之樂曰昧文更岐互不可究詰矣汪氏師韓以注闕堯字
未釋按盧氏文昭校定白虎通云舊本作南夷之樂曰堯西

夷之樂曰禁北夷之樂曰昧東夷之樂曰離也

觀萬方之歡娛又沐浴於膏澤又而怠於東作也後漢書觀

作親又作久於作乎六臣本無也字

注分命羲叔六臣本叔作仲是也

抑工商之淫業興農桑之盛務後漢書抑作除盛作上

賤奇麗而弗珍捐金於山沈珠於淵六臣本及後漢書弗並

作不余曰陸賈新語聖人不用珠玉而寶其身故舜棄黃金

於嶄巖之山捐珠玉於五湖之川以杜淫邪之欲也

注織紵綯繒布也六臣本紉作織是也

耳目弗營六臣本及後漢書弗並作不

嗜欲之源滅廉恥之心生後漢書源作原恥作正

注尚書傳曰天下諸侯何校傳上添大字是也

讜言宏說

注

字林曰讜美言也

惠氏棟曰說文讜直言也又

趙岐孟子注引書作禹拜讜言

注

下跪而上坐者謂之宴

段氏玉裁校曰下字衍按初學記

十四引亦無下字而王應麟詩攷引有是宋時本如此

注

蘇秦說孟嘗君曰

何校孟嘗君改秦惠王胡公攷異曰何

校誤也章懷注所引亦是孟嘗君此齊策孟嘗君將入秦章

文今本高注具存姚宏跋戰國策曾指此條爲今本所無其

失檢與何正同

曷若四瀆五嶽帶河沂洛圖書之淵

後漢書注河圖曰天有

四表以布精魄地有四瀆以出圖書

翼翼濟濟也

又

而不知京洛之有制也

又

而不知王者之無外

也六臣本並無也字

注說文矍驚視貌也 今說文矍大視也徐鍇以驚視釋之又

矍視遠貌也徐鍇以左右驚顧釋之

今將授子以五篇之詩 六臣本無以字後漢書亦無授作喻

注臨攝以威面氣悚 何校面改而後漢書注引無氣字

匪惟主人之好學 又請終身而誦之其詩曰 六臣本及後漢

書匪並作非後漢書無而字六臣本詩作辭

聖皇宗祀 後漢書注謂祭光武於明堂銑注聖皇謂明帝

注河圖曰蒼帝 王汁光紀 姜氏舉曰古微書帝命驗作蒼曰

靈府赤曰文祖黃曰神斗白曰顯紀黑曰元矩唐虞謂之五

府夏謂之世室殷謂之重屋周謂之明堂宋均注以靈府等

名爲五帝之府然則釋五位似當取五府之說

注子產若死其誰嗣之 今左氏襄三十年傳若作而其誰作

誰其段校云此可訂左傳也

注率土之濱 六臣本濱作賓

注說文曰皤老人貌也 今說文皤老人白也朱氏珔曰按皤老人貌也與易釋文同今說文作老人白當由古貌字作兒脫去下几卽爲白正可據此注及易釋文以正今本之誤段茂堂乃謂老人之色白與少壯之白皙不同故以次於皙殊屬強辭老人色不應白故稱黎老若是白字則宜云頭白也故皤字重文从頁作額段氏亦以爲白髮稱皤矣

抑抑威儀

五臣威作皇翰注皇儀天子威儀也

於赫太上

注

如淳曰太上天子也

漢書匡衡傳云太上者民

之父母又王褒四子講德論云太上聖明皆以太上稱天子翰注以太上爲天後漢書注又以太上爲太古立德賢聖之

人皆非

洪化惟神 後漢書洪作鴻

祁祁甘雨

注

毛詩曰興雨祁祁

顏氏家訓書證篇云詩有淠

淠興雲祁祁毛傳淠陰雲貌淠淠雲行貌祁祁徐貌箋云古者陰陽和風雨時其來祁祁然不暴疾也淠已是興雲何勞復云興雲祁祁耶雲當爲雨俗寫誤耳班固靈臺詩云習習祥風祁祁甘雨此其證也按詩正義云經興雨或曰興雲誤也定本作興雨釋文興雨如字本或作興雲非也開成石經亦作興雨臧氏琳曰呂覽務本篇漢書食貨志隸釋無極山碑韓詩外傳八引詩並作興雲知唐以前無作興雨者陸之釋文孔之正義及石經並據顏說改之耳

百穀綦綦

注

薛君曰穀類非一故言百也

後漢書綦綦作演

漆注漆漆盛貌按百穀之訓祇合如此楊泉物理論梁稻菽
三穀各二十種爲六十蔬果之實助穀各二十凡爲百穀並
蔬爲穀恐不盡然魯語祭法稱百穀百蔬必實其數則蔬又
豈止二十乎

庶草蕃廡 後漢書草作卉廡作蕪注引爾雅蕃蕪豐也按尙
書孔傳廡豐也正義以爲釋詁文今爾雅作蕪郭注繁蕪豐
盛彼疏云洪範庶草蕃廡蕪廡音義同姜氏皋曰楊氏錫觀
六書辨通云無說文豐也篆从大从卅从林大卅數之積也
林木之多也爲蕃無字會意隸作𣎵𣎵又省作無借爲有無
字其有無字篆本於大卅林下加亾字隸難以下筆故省从
無或借亾皆非本聲也廡說文堂下周屋也从广無書庶草
蕃廡注廡豐茂此借無字皆隸文變亂石經沿襲之譌

注韓詩曰蔡蔡者莪 今詩作菁菁毛傳盛貌與薛君訓蔡蔡

同但桃夭已云其葉蔡蔡何不引前而引後也

注說文曰歆氣上出貌 今說文歆歆氣出貌

寶鼎見兮色紛緼 五臣緼作紘濟注可證

煥其炳兮被龍文 濟注龍文謂鼎上鏤爲龍文後漢書注引

史記曰秦武王與孟悅舉龍文之鼎

注太常其以初祭之日 何陳校初改初是也各本皆誤後漢

書注可證

獲白雉兮效素鳥 後漢書注固集此篇題曰白雉素鳥歌故

兼言效素鳥

嘉祥阜兮集皇都 後漢書無此句

容絜朗兮於純精 六臣本及後漢書純並作淳

卷二 西京賦

薛綜注 何曰此注謂出薛綜疑其假託綜赤烏六年卒安得
引王肅易注又孫叔然始造反切未必遂行於吳綜傳有述
二京解之語恐亦不謂此賦按隋書經籍志有薛綜注張衡
二京賦二卷唐書藝文志有薛綜二京賦音二卷是此賦確
有薛注但未知卽今注否耳又按李用舊注皆題本名而補
注則別稱善曰如子虛上林用郭璞注思元賦用舊注魯靈
光殿賦用張載注射雉賦用徐爰注詠懷詩用顏延年沈約
注楚辭用王逸注皆是乃於揚雄羽獵賦用顏師古注之類
竟漏本名於班固幽通賦用曹大家注之類則散標句下三
都賦明云劉逵注蜀都吳都張載注魏都乃三賦俱題劉淵
林字豈後來排纂已非原書故體例互殊耶

心參體忼

胡公攷異曰忼當作泰注參忼同薛注云體安驕

泰者其本作泰而如字解之也又云泰或謂忼習之忼者讀泰爲忼又一解也善引小雅曰狃忼也者爲薛後解申說也然則善本必同薛作泰今各本作忼蓋不知者誤改之

化俗之本 六臣本作俗化之本

注揚雄河東賦曰河靈襲蹈掌華蹈襄 今漢書揚雄傳下四

字作爪華蹈襄按爪古掌字襄山卽襄山史記封禪書可證水經河水注引河東賦亦作襄王氏念孫曰余靖初校漢書監本作襄是也蕭該所見一本作嶼者雖非正體然加山作嶼則其字之本作襄明矣郊祀志作襄者傳寫誤耳未可引以爲據宋祁所引封禪書及西京賦並作襄而今本皆作襄則又後人據郊祀志改之也封禪書正義尙作襄音色眉反

則襄字爲後人所改無疑義門讀書記云從汲古後人得小字宋本史記襄字正作衰水經注引封禪書河東賦並作襄恐亦後人所改也

注說文曰隔塞也 今說文隔障也

注說文曰岐山在長安西美陽縣界山有兩岐因以名焉 今說文無此語此係舊注所引當是說文正本

於前則終南太乙注二山名也 六臣本薛注作終南太一二

名也胡公攷異曰二名也者謂一山有二名耳謹按潘岳西征賦云背終南而面雲陽又云太乙龍嵒則終南太一判然故李注云不得爲一山也姜氏皋曰按太平御覽三十八辛氏三秦記太一在驪山西去長安二百里中有石室靈芝太一旣在長安西似非終南山矣

隆嶠崔率隱轡轡律

注

山形容也

五臣嶠作嶠濟注可證六

臣本薛注作隆嶠之類皆山形容也

抱杜含鄂

廣韻引西京記抱土含臄卽此句也朱氏珔曰按

古土杜字通用毛詩桑土韓詩作桑杜是也廣韻臄侯古切

音戶字彙補謂與鄂同據姚察史記訓纂云戶扈鄂三字一

也其从虎者音相近耳姜氏皋曰詩傳桑土桑根也方言三

荑杜根也東齊曰杜或曰艾郭注詩曰微彼桑土是也臧氏

琳曰漢書地理志右扶風杜陽師古引詩自土沮漆云齊詩

作自杜尤足爲此賦杜土通用之確證

欲澧吐鎬

五臣鎬作瀉向注澧水流入故言欲瀉水流出故

言吐

注

爾雅曰爰有寒泉

六臣本以此七字爲薛注按此七字上

下不相承接疑有誤孫氏義鈞曰此注疑在下節九嶷甘泉
涸陰沍寒之下玩薛注其處常陰寒之語可見或誤以承爰
有之文耳爾雅亦當爲毛詩之說

其遠則九嶷甘泉 六臣本則下有有字

實惟地之奧區神皋

注

神皋接神之聲

六臣本惟作爲按史

記封禪書云自古以雍州積高神明之奧蓋取精誠上通之
意登高封禪者皆是也若陳寶之來集於祠城其聲殷云又
從官在山下聞若有言萬歲者正義引漢官儀曰有稱萬歲
可十萬人聲此注接神之聲義或本此

昔者大帝說秦繆公而覲之饗以鈞天廣樂帝有醉焉乃爲金
策錫用此土而剪諸鶉首 史記封禪書及趙世家扁鵲傳俱
載此事葉適習學記言謂此醫師語不足信山海經海內東

經注引墨子曰秦穆公有明德上帝使勾芒賜壽十九年陶宗儀說郭本尙書中候云穆公出狩天大雷有火化白雀銜綠文丹書集於車書言穆公之霸訖胡亥事其誕正同

注山海經曰閩風之山或上倍之是謂元圃或上倍之是謂大帝之居今山海經無此語此出淮南子墜形訓恐李誤耳

五緯相汁六臣本汁作叶按爾雅淮南子歲在未皆作協洽史記天官書作叶洽漢隸字源樊敏碑作汁洽周禮注卿士汁曰禮大傳疏黑帝汁光紀皆汁與叶協相通之證

天啓其心孫氏志祖曰鄭語是天啓之心也又晉語非天誰啓之心

天命不滔注天命不滔五臣滔作誥良注可證胡公攷異曰注滔當作誥下注言滔與誥音義同可見各本皆誤姜氏舉

曰注引子高曰天命不諂是左氏哀十七年傳釋文云諂本又作滔然則李引自作滔故曰滔與諂音義同也

於是量徑輪

注

南北爲徑東西爲廣善曰說文曰南北曰袤

六臣本徑輪作經綸汪氏師韓文選理學權輿云李引說文與薛解異竊思徑其中也輪其外也廣言橫也袤言直也凡物圓則有徑輪方則有廣袤此注似猶未允

注洫域池也

又域外大郭也

元槩本兩域字均作城字是也

豈啓度於往舊

六臣本啓作稽

乃覽秦制

六臣本乃上有爾字

疏龍首以抗殿

三輔黃圖營未央宮因龍首山以制前殿注

云山長六十里秦時有黑龍從南山出飲渭水其行道因成土山疏山爲臺殿不假板築高出長安城

巨雄虹之長梁 余曰京房易傳蜺四時有之惟雄虹見藏有月蔡邕月令章句雄曰虹雌曰蜺

注禁檠已見西京賦 何陳校京改都是也

流景曜之韡韡 六臣本韡作暉

雕楹玉碣 注廣雅曰碣磧也碣與𪔐古字通 據注則正文碣

當作𪔐 注謂正文之𪔐與廣雅之碣通也碣之言藉也履之爲𪔐義與此同故墨子備城篇云柱下傳𪔐今廣雅釋宮礎磧磧也無碣字而本書景福殿賦注及集韻類篇引並有之是今本廣雅脫也

設切厓隙 六臣本切作砌

坻堦鱗眴棧齮嶢嶮 葉氏樹藩校本云坻堦棧齮蓋坻之堦

棧之齮也

廣雅釋詁貳福鎡倅並訓爲盈今本福亦誤作福史記龜策傳邦福重寶徐廣注福音副藏也漢尹宙碑位不福德魏上尊號奏以福海內欣戴之望字並从衣不从示

注縣鐘格曰筍植曰虞案考工記梓人注樂器所縣橫曰鎡植曰虞禮記檀弓注橫曰鎡植曰虞詩靈臺毛傳植者曰虞橫者曰枸篴篴枸俱與筍同又有謦傳植者爲虞衡者曰枸衡亦卽橫字也後東京賦崇牙張下設業設處下兩引皆橫字知此處格字亦當作橫

注說文注曰胡公攷異曰注字不當有各本皆衍

叛赫戲以輝煌注赫戲炎盛也六臣本赫下有盛字誤衍離

騷陟陞皇之赫戲兮王逸注云赫戲光明貌

注三輔三代故事曰按下列引三輔三代舊事其書今不可

攷或校去三代二字恐非

注 賁積也薛君曰賁 胡公攷異曰當作薛君曰賁積也六字

各本皆誤張氏雲玆曰賁字或誤從竹

高門有閼

注

毛詩皋門有伉與閼同

詩釋文伉本又作亢韓

詩作閼說文伉閼也閼門高也

蘭臺金馬

六臣本句首有外有二字

虎威章溝

注

未聞其意

此薛注也李注未及按三輔黃圖虎

威章溝皆署名濟注本此然仍未聞其意也姜氏舉曰虎威

章溝三輔黃圖與長水中壘屯騎虎賁越騎步兵射聲胡騎

八營同列謂皆宿衛王宮周廬直宿處也本書蜀都賦武義

虎威劉注二門名也思元賦右素威以司鉦舊注素威白虎

威也似虎威者繪虎於門如禮云右白虎也古今注長安有

御溝謂之楊溝則章溝或亦相同

衛尉八屯 濟注屯營也八營謂長水中壘屯騎武賁越騎步

兵射聲胡騎言此八營皆衛尉掌之葉氏樹藩曰後漢書百官志長水等屬北軍中侯不屬衛尉衛尉所屬南宮南屯司馬主平城門宮門蒼龍司馬主東門元武司馬主元武門北屯司馬主北門北宮朱爵司馬主南掖門東明司馬主東門朔平司馬主北門凡七門又云中興省旅賁令衛士一人丞據此則西京於七門外復設旅賁令是爲八屯按濟注以八校尉爲八屯蓋漢以南北軍相統八校尉雖屬北軍中侯而衛尉亦得統之若後志之七門司馬已屬東京制度且旅賁是令丞不與諸屯之列葉說恐非顧氏千里曰薛注周宮外於四方四角立八屯李注引漢書曰衛卿掌門衛屯兵二注

相承數八屯者以宮外四方四角而已皆衛尉所帥吏士故
百官公卿表謂之屯兵魏都賦所云宿以禁兵司衛閑邪與
此同義最爲確當五臣別以校尉當之後來又有變七門司
馬者考之於表彼八校尉不掌巡警七門司馬與八屯更不
相合莫如祛紛紛無當之論守薛李八屯舊說爲長也

警夜巡晝 晝字與上處署附及下虞爲韻按易林井之復晝
與據井之渙晝與故渙之蠱晝與懼皆韻是古音晝不作陟
救切也

注說文曰鍛鉞有鐔也一曰鋌似兩刃刀 今說文無一曰以
下七字段曰此恐是薛綜解語

嗟內顧之所觀 注小雅曰嗟發聲也 胡公攷異曰嗟當作羌

注同善引小雅廣言羌發聲爲注是其本作羌甚明六臣本

所載良注云嗟歎聲是其本改作嗟亦甚明各本以五臣亂善又並注中改爲嗟益不可通矣

注說文曰縹繁采飾也 今說文飾作色而本書月賦注景福殿賦注答盧諶詩注引並同此惟景福殿賦注答盧諶詩注引無繁字

屬長樂與明光 程氏大昌雍錄云漢有明光宮三一在北宮南與長樂相連者武帝太初四年起一在甘泉宮中一爲尙書奏事之所按三輔黃圖明光宮武帝太初四年秋起在長樂宮後南與長樂宮相連屬卽此也

注漢書武帝故事 何陳校去書字是也胡公攷異曰漢上堂有善曰二字六臣本有分此下至末爲善注者是也又下文結重樂以相承注廣雅曰上亦當有善曰二字與此同

後宮不移 六臣本句首多於是二字

官以物辨 六臣本毛本辨作辦

獲林光於秦餘處甘泉之爽壇 六臣本之作而趙氏曦明日

關輔記云甘泉宮一曰林光宮秦所造在甘泉山宮以山爲
名賦似主此說按三輔黃圖林光宮胡亥所造從廣各五里
在雲陽縣界

通天諺以竦峙 六臣本諺作眇

注漢書舊儀云 陳校去書字是也

上辨華以交紛 五臣辨作辦音葩良注辦華交紛言文綵交

錯楊氏慎丹鉛錄引梁元帝纂文云辦華文麗也

注刻隋升高也 六臣本升作斗是也

伏櫺檻而頰聽 注頰古字音府 六臣本頰作俯陳曰注中古

字下當有俯字是也各本皆脫

越巫陳方 漢書武帝紀太初元年二月起建章宮文類注越巫名勇謂帝曰越國有火災卽復大起宮室以厭勝之故帝作建章宮

鳳騫翥於薨標咸遡風而欲翔

注

說文曰騫飛貌也

騫當作

騫在鳥部本書魏都賦張注引騫翥作翥騫咸作感

注以函屋上六臣本函作甬是也

交綺豁以疏寮六臣本交作文

注廣雅曰曲枅段校廣字上添善曰二字

注山海經曰陳校經下添注字是也

非都盧之輕趨呂氏春秋悔過篇氣之趨與力之盛高誘注

趨壯也本書赭白馬賦捷趨夫之敏手

注說文曰趨善緣木之士也 今說文趨善緣木走之才

檜桴重芬 又反字業業 六臣本檜作增反作及

飛檐轍轍 注轍轍高貌 說文轍轍高貌也毛詩碩人庶姜孽

孽韓詩作轍云長貌呂氏春秋過理篇注引亦作轍轍云高
長貌皆與薛注合向注偃起貌恐無據

輶輻輕鶩 六臣本輶作輶是也此尤本誤毛本亦因之兩本
注尙不誤也

途閣雲蔓 五臣途作連銑注可證匡謬正俗引同

注說文曰詭遑也 今說文詭賁也本書海賦注引作詭變也

朱氏珣曰詭遑也之訓見淮南主術篇而漢書顏注屢用之
非說文語此處與海賦注兩岐則必有誤訓變亦不知何據
姜氏皋曰本書辨亡論古今詭趣李注說文曰詭變也詭與

詭同今說文詭變也从心危聲海賦瑕石詭暉句注卽本此
偶失詭與詭同四字耳

望窻窻以徑廷 廣雅釋詁窻窻深也集韻窻同窻按窻窻卽
西都賦之杳窻故李不重注

珍臺蹇產以極壯塏道邇尙以正東 何校壯改北六臣本塏

作塏按極壯二字各注未及此與正東爲偶句作北爲是

注蹇產形貌也 此薛注未晰按楚辭九章思蹇產而不釋王

逸注蹇產詰屈本書上林賦蹇產溝瀆張注亦云詰曲也

前開唐中彌望廣濶 五臣唐作望濶作象良注可證按廣雅

釋訓廣濶浩濶也本書上林賦灝灝廣濶長笛賦曠濶敞罔

七發浩濶濶兮音義並相近

長發激於別隄 五臣隄作島濟注可證按薛注隄音島則正

文不宜作島矣集韻島一作隄

濯靈芝以朱柯 六臣本以作於

注海若海神 莊子秋水篇望洋向若司馬彪注若海神也

注廣雅曰蹉跎失足也 今廣雅無此五字按楚辭九懷中坂

蹉跎補注云蹉跎失足

注凡人姓名及事易知而別卷重見者云見某篇亦從省也他

皆類此 此李注自述凡例特標出之

想升龍於鼎湖 何曰漢武作鼎湖宮於藍田見揚雄羽獵賦

注按三輔黃圖鼎湖宮在湖城縣界

參塗夷庭 注庭猶正也 孫氏志祖曰爾雅庭直也

注以廛任國中之地 胡公攷異曰廛下當有里字各本皆脫

此載師職文也

北闕甲第孫氏志祖曰漢書夏侯嬰傳賜嬰北第第一曰近我以尊異之師古曰北第者近北闕之第嬰最第一也故張衡西京賦云北闕甲第當道直啓

注說文曰陞落也 陞當作墜各本皆誤

注劉逵魏都賦注 劉逵當作張載

文選列證卷第三

閩長樂梁章鉅撰

卷二下 西京賦下

爾乃廓開九市通關帶闔旗亭五重俯察百隧 三輔黃圖云
長安市有九各方二百六十六步六市在道西三市在道東
凡四里爲一市致九州之人在突門夾橫橋大道市樓皆重
屋又有旗亭樓在杜門大道南又有當市樓有令署以察商
賈貨財買賣貿易之事三輔都尉掌之直市在富平津西南
二十五里卽秦文公造物無二價故以直市爲名張衡西京
賦云郭開九市通關帶闔旗亭重立俯察百隧是也

注崔豹古今注曰市牆曰闔市門曰闔善曰 按善曰二字當
在崔豹上今在曰闔下非也崔豹晉人非薛注所得引

周制大胥今也惟尉

注

周禮曰司市胥師二十人

翰注周禮

市制大胥職今但屬三輔都尉胡公攷異曰十下當有肆則

一三字各本皆脫此地官序官文也

裨販夫婦

此與下鄙恃史爲韻故楊氏慎古音叢目四紙引

此句婦作房詭切然易彖傳父父子子兄弟弟夫夫婦婦

子弟婦已爲韻顧氏易音云婦古音房以反詩氓同

注

夕時爲市

爲當作而各本皆誤

注

蒼頡篇曰里侮也廣雅曰眩亂也

按廣雅釋詁里與眩同

訓亂方言里悻悻也注謂悻惑也

何必昏於作勞

注

昏勉也

書孔傳昏強也鄭注昏讀爲散散

勉也按散當爲敗說文敗彊也彊與勉義同朱氏珔曰按孔

傳昏強也蓋本爾雅昏瞽皆訓彊彊與彊同說文散字云冒

也與敗異訓玉篇則謂敗散同字又曰昏从氏省宜從氏不
从民姜氏臯曰張參五經文字愍字下云緣廟諱偏旁準式
省從氏凡泯昏之類皆從氏是也然則玉篇所云宜从氏不
从民者疑非

麗美奢乎許史 孫氏志祖曰爾雅奢勝也

^注今大官以十日作 胡公攷異曰日當作月各本皆誤

睚眦薑芥 楊氏伯崑臆乘云世稱芥蒂或芥蒂往往字音皆
未詳按此五臣注怒貌李注引張揖子虛賦注曰蒂芥刺鯁
也薑與蒂同郭象莊子注亦云薑芥

^注武陵 何校武改茂六臣本亦有作茂者

^注蒼頡曰 何陳校頡下添篇字按本書注所引各書或闕篇

字傳字注字序字多類此

注五十里爲之郊 六臣本之作近是也

注毛詩曰封畿千里 公羊桓九年傳疏引作封圻按改邦爲

封此當是漢人避諱而後人因之翟氏灝四書考異云尙書

大傳引作邦圻千里公羊疏亦引作圻是畿本作圻也又書

酒誥圻父薄違鄭注圻父謂司馬主封畿之事蓋本周禮大

司徒制其畿疆而溝封之故曰封

繚垣綿聯注今並以亘爲垣 陳曰據此注則正文及薛注中

垣皆當作亘孫氏志祖曰薛本作繚亘故以繞了解之李本

自作垣故云今並以亘爲垣且引西都賦繚以周墻爲證楊

慎丹鉛錄譏李善以垣爲亘殊誤

羣獸駭駭注薛君韓詩章句曰趨曰駭行曰駭 後漢書馬融

傳鄙駭譟謹注云鄙駭駭奮迅貌也引韓詩駭駭駭或羣

或友今毛詩吉日作儻儻俟俟傳云趨則儻儻行則俟俟魯頌駟以車伾伾傳云伾伾有力也釋文云字林作駟走也說文俟字注引詩伾伾俟俟楚辭招魂逐人駟駟些王注駟駟走貌也是駟與伾鄙儻駟與俟並以聲近通用矣孫氏義鈞曰駟說文馬行侂侂也此韓詩章句訓行之正義毛傳亦作趨則伾伾行則俟俟按韓詩之駟駟正字也毛許作伾俟假借字也儻者伾之轉爲雙聲字

櫛爽櫛櫛 說文櫛長木貌本書吳都賦櫛櫛森萃李注櫛長直貌宋玉九辨櫛櫛之可哀兮

注爾雅曰芄東籛郭璞曰未詳 集韻芄葉似蒲叢生

注爾雅曰癸懷羊郭璞曰未詳 今爾雅癸作薨玉篇作癸類

篇云芋之惡者曰薨漢書稱芋曰芋魁魁與薨音近翟氏頌

謂懷羊之羊芋字之誤然此上下與荒岡爲韻自應作羊

葦葦蓬葦 說文葦叢草也玉篇葦葦草叢生也晉書衛恒傳

禾卉葦葦以垂穎韓愈詩草木森葦葦皆本此

篠簜敷衍

注尚書曰瑤琨篠簜旣敷瑤琨二字衍

黑水元趾 五臣趾作沚濟注可證林先生曰元趾本黑水所

渚遠在三危地漢書特擬其形耳

注謂昆明靈沼之水沚也 胡公攷異曰沚當作趾各本皆誤

姜氏臯曰本書潘安仁河陽縣詩注韓詩曰宛在水中沚薛

君曰大渚曰沚則從沚是也釋名釋水者从沚釋邱者从沚

此僅以薛綜曰小渚曰趾故曰當從趾耳

樹以柳杞

注山海經曰杞如楊赤理今東山經云東始之山

有木焉其狀如楊而赤理其汁如血其各曰芑芑字當依此

改第李注又以杞爲卽榎木所未詳也

注淮南子曰日出暘谷又楚辭曰出自暘谷暘陽並當作湯

說詳後東京賦下

注鮎也 六臣本鮎作鮎按鮎卽鯪字鮎卽鮪字爾雅鯪鮪

注今吹沙小魚若鮎乃大魚說文鮎出樂浪潘國从魚沙省

聲與鮪鮎之鮎判然兩物也

注鱣似鰓知連切 黃氏生字詒云山海經注鰓魚似蛇書大

傳注鰓或爲鰓似蛇之鰓旣借徒河切之鰓又借張演切之

鰓而皆轉爲常演切顏氏家訓亦云鵠雀銜鰓多借鰓鰓之

鰓姜氏臯曰似鰓之鰓尔疋本作鰓不作鰓字林考逸云鰓

長鼻魚也自以形近誤鰓爲鰓遂以鰓爲鰓相承者蓋已久

此注尚引作鰓可證也

注爾雅曰鰾鰾也音童毛萇詩傳曰鰾似鮎鮎乎軌切鮎奴謙切又曰鰾揚也胡公攷異曰鰾上當有郭璞曰三字此引釋魚注也毛萇詩傳曰五字當作又曰二字鰾似鮎當作鮎鰾屬鰾似鮎六字此引釋魚也又曰當作毛萇詩傳曰五字此引魚麗首章傳也今脫落錯互絕不可通段校於曰鮎下添鰾也郭璞山海經注曰鰾十字又曰上添毛萇二字

注孟春鴻來鴻下當有雁字各本皆脫

奮隼歸鳧六臣本奮作集胡公攷異曰集隼與歸鳧對文猶揚子雲以雁集與鳧飛對文也薛與李必亦作集傳寫譌奮耳謹按薛注奮迅聲也則正文作奮不作集奮隼與歸鳧正對一奮一歸與揚子雲以集對飛亦相合六臣本似非

沸卉駢句五臣駢作碎濟注可證

注邊上慘烈 上當作土本書所載李陵書烈作裂

剛蟲搏擊 六臣本擊作驚

衍地絡 玉篇手部拈余忍切西京賦拈地絡拈謂巾布也

在彼靈囿之中 六臣本彼作於

前後無有垠鍔注淮南子曰出於無垠鍔之門許慎曰垠鍔端

崖也 今淮南子原道訓作出於無垠之門而倣真訓有形埒

垠埒語許注當繫彼處埒與鍔通漢書揚雄傳作鄂後漢書

張衡傳作鄂並同以鍔爲埒荀子成相之以銀爲垠也

作木翦棘注柞與槎同 六臣本柞作槎金氏甦曰詩載芟載

柞傳除木曰柞周禮柞氏掌攻草木何必借槎字作解乎

注賈逵國語曰 何校語下添注字是也各本皆脫

麀鹿麀麀注毛詩曰麀鹿攸伏 金氏甦曰詩吉日麀鹿麀麀

何以成句不引而引攸伏句耶

駕雕軫 林先生曰隋志與漢室制度以雕玉爲之故王符羽

獵賦云天子乘碧璫之雕軫

六駿駿

注

天子駕六馬

下篇東京賦六元此之奕奕薛注六

六馬也天子駕六馬又甘泉賦駟蒼螭兮六素蚪李注春秋
命厯序曰皇伯駕六龍又上林賦六玉蚪張注六玉蚪謂駕
六馬郭璞曰韓子曰黃帝駕象六蛟龍又羽獵賦六白虎李
注杜業奏事曰轅車駕白虎白虎馬名皆與此注合按書五
子之歌藥乎若朽索之馭六馬正義云經傳之文惟此言六
馬漢世此經不傳餘書多言駕四者春秋公羊說天子駕六
毛詩說天子至大夫皆駕四許慎案王度記云天子駕六鄭
元以周禮校人養馬乘馬一師四圉四馬四乘康王之誥云

皆布乘黃朱以爲天子駕四漢世天子駕六非常法也然則此言馬多懼深故舉六以言之此說本五經異義及鄭駁證以史記秦本紀李斯列傳漢書禮樂志續漢書輿服志白虎通及蔡邕獨斷皆言六馬皆秦漢諸儒所述與鄭駁相符惟逸周書王會解云天子車立馬乘六石鼓文云趨趨六馬荀子勸學篇云六馬仰秣又修身篇云六驥不致又議兵篇云六馬不和莊子逸篇云六鐵蒙以大縶載六驥之上此則皆出周人之書疑周代卽有天子駕六之制但如五子之歌所云移之夏初恐係僞古文之謬別無證據也

注說文曰較車轡上曲鈎也 今說文較車騎上曲銅也惟徐

鍇本作轡與此同

璿弁玉纓

注

弁馬冠也又髦

六臣本璿作瓊案左傳瓊弁玉

纓說文引亦作璿此處專言車馬故薛注以弁爲馬冠雖用左傳之語不必同其本義也 胡公攷異曰又當作义各本皆誤

建元弋 何曰史記天官書杓端有兩星一內爲矛招搖一外爲盾天鋒晉灼曰外遠北斗也在招搖南一各元戈此言元弋疑誤杜牧詩已建元戈收相土似卽用此姜氏臯曰後漢書馬融廣成頌棲招搖與元弋注枉矢于天狼章懷注招搖元弋天狼並星名是古本作弋或牧之誤用也

注

元弋北斗第八星名爲矛頭主胡兵招搖第九星名爲盾

按史記天官書北斗七星用晉建者杓杓端有兩星一內爲矛招搖一外 盾天鋒孟康曰斗第七星杓索隱引說文云杓招搖也禮記招搖在上鄭注云招搖星在北斗杓端主指

者孔疏春秋運斗樞云北斗七星第一天樞第二旋第三璣
第四權第五衡第六開陽第七璣光第一至第四爲魁第五
至第七爲杓璣光卽招搖也是杓其總名招搖爲北斗第七
星名在斗內不在斗外故天官書云一內爲矛招搖在斗外
名元戈卽天官書所謂一外爲盾天鐙者也至北斗本係九
星索隱引徐整長厯云其二陰星不見則元戈招搖之可見
者必非斗之八九星也薛注並誤

曳雲梢 梢當作旃

^法弧旌枉矢以象牙飾 牙飾當作弧也各本皆誤

屬車之造 ^注造副也 造當作造廣雅釋詁貳福造倅犢盈也

左傳昭十一年僖子使助造氏之造杜注造副倅也釋文云

說文造从艸是

載獫狁獠

大臣本獠作獠

注

豹尾車同制也

何陳校同改周各本皆誤

注

漢書曰虞初周說九百四十三篇初河南人也

大臣本虞

初下十五字作虞初者洛陽人明此醫術十字按今漢書顏注引史記云虞初洛陽人而無明此醫術云云大臣本注不知所據

注

說文曰儲具也

今說文儲待也本書羽獵賦注引作儲待

待也海賦注引作儲積也左太冲詠史詩注又引作儲畜也朱氏珣曰案儲字之訓引說文以羽獵賦注儲待也爲正彼處待字當是誤衍此具也及後積也畜也又曹子建贈丁翼詩注謂蓄積之以待無也皆兼舉演說文語非原文也

蚩尤秉鉞

注

山海經曰蚩尤作兵伐黃帝

林先生曰漢書祠

黃帝祭蚩尤於沛亭而豐鼓旗應劭曰蚩尤古天子好五兵故祭之臣瓚曰蚩尤庶人之貪者吳氏仁傑兩漢刊誤補遺云天文志蚩尤之旗類彗而後曲象旗見則王者征伐四方則所祭者天星也封禪書祠八神一主兵爲蚩尤星若李注所引則競亂之鬼耳奚足禁禦不若哉

注毛萇曰鬣萇當作長各本皆誤

螭魅魍魎注說文曰螭山神獸形六臣本螭作魍今說文夙

部樹山神獸也也字蓋誤說文無魍字蟲部有螭字訓若龍

而黃鉏氏樹玉曰魍卽樹之俗字宣三年傳作螭魅罔兩杜

注螭山神獸形是亦借螭爲樹也

睢盱拔扈注畔拔猶拔扈拔與跋古字通六臣本拔作跋按

正文當作跋扈注當作跋扈

光炎燭天庭 六臣本炎作烟

失歸忘趨注趨向也 據注趨當作趣六臣本亦作趣

飛罕瀟飈 五臣瀟作捕向注捕飈著物貌

流鏑擣搯 向注鏑箭鏃按漢書匈奴傳頭曼子冒頓作鳴鏑

注應劭曰髡箭也

注說文曰鋌小戈也 今說文鋌小矛也本書東都賦注引亦

作矛

當足見礪注足所蹈爲礪 又礪女展切 礪當作躐六臣本不

誤尤本躐礪錯見毛本則盡誤爲礪矣

又簇之所撻撻 林先生曰簇與籍同殷敬順列子釋文曰籍

謂以竹木圍繞

徒搏之所撞撻注撞撻猶撻卑也 方言撻椎也南楚凡相椎

搏曰搃列子黃帝篇曰搃搃揆挑釋文搃搃打也搃搃與撞搃搃畢皆聲近而義同

白日未及移其晷 六臣本無其字

若夫游鵠高翬注翬翬飛也按爾雅伊洛而南素質五采皆

備成章曰翬郭注翬亦雉屬而此與下鵠免聯猿爲偶句故薛注以飛釋之

鵠免聯猿 五臣猿作遂良注可證

乃有迅羽輕足 六臣本有作使

注鴈青脰者善曰 六臣本無曰字是也此節注有兩善曰此

善字應屬上讀自此下至不遠而獲皆薛注也

隅目高匡又莫之敢仇 六臣本匡作眶仇作亢林先生曰相

馬經云眼欲高眶

中黃之士 翰注中黃國名其俗多勇力 先通奉公曰文心

雕龍指瑕篇云西京稱中黃育獲之儔而薛綜謬注謂之閭

尹是不聞孰雕虎之人也今薛注無閭尹之說蓋李刪之

朱鬣鬣髻 胡公攷異曰鬣當作髻廣韻十三祭髻露髻卽出

此善注引通俗文露髻曰髻及善音作計切是也各本皆傳

寫誤謹按說文髻束髮少也从髟截聲繫傳亦引此爲證

注說文曰髻帶髻頭飾也 今說文髻帶結飾也

奎踠盤桓 六臣本奎作踠按說文奎兩髀之間莊子徐无鬼

篇奎踠曲隈則作奎自通

鼻赤象罔巨狔 金氏姓曰頤其鼻卽謂之鼻猶子虛賦脚麟

卽謂持其脚也羽獵賦漸巨狔服虔但曰獸名子虛賦螭

郭璞曰螭大獸長百尋下文亦云巨獸百尋是爲曼延字

雖互異卽此一物大指謂象之赤者則頓其鼻而執之獫之

注巨者亦盛之圀半耳薛注似迂

巨獫廌也又又穿廌以著圀 顧氏千里曰按字書皆無廌

注字當俟考姜氏臯曰疑卽廌字徂古切集韻大也

注說文曰圀畜閑也 今說文圀養畜之閑也而本書赭白馬

賦注引同此

搯狒狒批窳狻 五臣狒作髴窳作掇翰注可證朱氏珣曰狒

薛注作鬻案說文引爾雅鬻鬻如人被髮讀若費今爾雅作

注狒狒集韻或作鬻卽說文之鬻字也

虎亦食人 亦當作爪各本皆誤

陵重巘 毛詩皇矣正義引此巘作巘孫氏義鈞曰爾雅釋山

重巘陳郭注謂山形如累兩巘巘山狀似之因以名與李注

山上天下小之義通作𪔐者是也

杪木末注杪猶表也說文杪木標末也標木杪末也二字音

義相近賦以杪爲標故訓爲表

獼獼注獼獼獼類而白腰以前黑說文獼獼鼠黑身白腰

若帶手有長白毛似握版之狀類猿雌之屬繫傳引此作獲

獼胡廣韻獼獼似猿黑身白腰手有長白毛善超坂絕巖也

玉篇集韻並作獼獼史記又作獼胡音義並同本書上林賦

張揖注云獼胡似獼猴頭上有毛腰以後黑按諸家或云腰

以前黑或云黑身白腰或云腰以後黑未知孰得其實

常亞於乘輿余曰漢武故事凡諸官美人可有七八十與上

同輦者十六人員數恒使滿

注其樂只且辭也六臣本辭上重且字是也

注高唐賦曰 高唐賦當作神女賦此偶誤

收禽舉觥 金氏牲曰詩助我舉柴柴說文作桴謂積禽也

置互擺牲 周禮牛人凡祭祀共其牛牲之互

頒賜獲鹵注鹵與虜同 六臣本鹵作虜

注空滅無也 六臣本滅作滅下同

清酤敍 左氏襄二十九年傳正義云古人多祇同音施與多

為韻引此敍作多邢昺論語疏同

注廣雅曰敍曰多也 曰字不當有各本皆衍

皇恩溥洪德施注皇皇帝普博施也 六臣本校云善本無此

二句按本書魏都賦注引西京賦曰皇恩溥則有若是左傳

襄二十九年正義引亦有此六字其注七字乃尤本所添不

知何所出且正文溥注作普亦似有誤也

相羊乎五林之館 六臣本相羊作僂佯

聯飛龍

注

飛龍鳥名也

顧氏千里曰案楚世家有鷩集解徐

廣引呂靜曰鷩鳥野鳥也索隱鄒誕鷩音虛動反劉氏音龍

是小鳥名當卽薛注之飛龍也古字假借龍與鷩通用

注

說文曰礪以石著繳也

今說文礪以石箸雉繁也

注

琴道雍門周曰水嬉則舫龍舟

據後漢書桓譚傳注琴道

爲所著新論篇名本書注引琴道者前後凡十一見三十五

卷七命注引琴道語與此同此賦下建羽旗句及二十八卷

陸士衡樂府注引作水嬉則建羽旗又十六卷恨賦注引琴

道雍門周說孟嘗君曰幼無父母壯無妻子若此人者但聞

秋風鳴條則傷心矣又引琴道雍門周曰高臺旣已傾曲沼

又已平墳墓生荆棘狐兔穴其中又別賦注引琴道曰雍門

周以琴見孟嘗君孟嘗君曰先生鼓琴亦能令悲乎周曰臣之所能令悲者無故生離遠赴絕國無相見期臣爲一揮琴而太息未有不悽愴而流涕者又十八卷笙賦注引琴道曰雍門周見孟嘗君孟嘗君曰先生鼓琴亦能令人悲乎對曰臣之所能令悲者先貴而後賤故富而今貧於是雍門揮琴而孟嘗君流涕又二十一卷虞子陽詠霍將軍詩注引琴道雍門周說孟嘗君曰千秋萬歲後高臺旣已傾曲池又已平又二十八卷陸士衡樂府注引琴道雍門周曰廣廈兮邃房又三十卷謝元暉和王主簿詩注引琴道雍門周曰一赴絕國此外別有引雍門周語雖不標琴道篇名而可以互證而知者又凡十二見如六卷魏都賦注引雍門周說孟嘗君以強秦之勢伐弱薛猶礪蕭斧以伐朝菌也又四十三卷邱希

範與陳伯之書六十卷陸士衡弔魏武文引並同又二十三
卷張孟陽七哀詩注引雍門周以琴見孟嘗君曰臣竊悲千
秋萬載後墳墓生荆棘狐兔穴其中樵兒牧豎躑躅而歌其
上行人見之悽愴孟嘗君之尊貴如何成此乎孟嘗君喟然
嘆息淚下承睫又二十八卷陸士衡樂府注引雍門周曰秋
風鳴條則傷心矣又三十一卷劉休元擬古詩注引雍門周
說孟嘗君今君下羅帳來清風又三十五卷漢武帝詔注引
雍門周曰遠赴絕國相見無期又三十九卷任彥昇爲卞彬
謝啟注引雍門周以琴見孟嘗君曰臣竊悲千秋萬載後墳
墓生荆棘狐兔穴其中樵兒牧豎躑躅而歌其上也又四十
一卷李少卿答蘓武書注引雍門周鼓琴見孟嘗君曰先生
鼓琴亦能令悲乎對曰所能令悲者遠赴絕國無相見期若

此人者但聞飛鳥之號秋風蕭條則心傷矣又四十二卷魏文帝與吳質書注引雍門周曰身材高妙懷質抱真又四十六卷陸士衡豪士賦序注引雍門周以琴見孟嘗君曰先生鼓琴亦能令文悲乎對曰臣竊爲足下有所悲千秋萬歲後墳墓生荆棘游童牧豎躑躅其足而歌其上曰孟嘗君之尊貴亦猶若是也於是孟嘗君喟然太息涕承睫而未下雍門周引琴而鼓之徐動宮徵揮角羽初終而成曲孟嘗君遂歔歛而就之又五十八卷褚淵碑文注引雍門周說孟嘗君曰有識之士莫不爲足下寒心酸鼻按以上所引章法錯互字句差池要皆一事也今惟裴松之三國志注引新論此節首末獨爲完整脩錄於左以資攷校云蜀志卻正傳注引桓譚新論曰雍門周以琴見孟嘗君曰先生鼓琴亦能令文悲乎

對曰臣之所能令悲者先貴而後賤昔富而今貧擯壓窮巷
不交四都不若身材高妙懷質抱真逢讒懼謫怨結而不得
信不若交歡而結愛無怨而生離遠赴絕國無相見期不若
幼無父母壯無妻兒出以野澤爲鄰入用掘穴爲家困於朝
夕無所假貸若此人者但聞飛鳥之號秋風鳴條則傷心矣
臣一爲之援琴而長太息未有不悽惻而涕泣者也今若足
下居則廣廈高堂連闔洞房下羅帷來清風倡優在前諂諛
侍側揚激楚舞鄭妾流聲以娛耳練色以淫目水戲則舫龍
舟建羽旗鼓釣乎不測之淵野游則登平原馳廣囿强弩下
高鳥勇士格猛獸置酒娛樂沉醉忘歸方此之時視天地曾
不若一指雖有善鼓琴未能動足下也孟嘗君曰固然雍門
周曰然臣竊爲足下有所常悲夫角帝而困秦者君也連五

國而伐楚者又君也天下未嘗無事不從卽衡從成則楚王
衡成則秦帝夫以秦楚之強而報弱薛猶磨蕭斧而伐朝菌
有識之士莫不爲足下寒心天道不常盛寒暑更進退千秋
萬歲之後宗廟必不血食高臺旣已傾曲池又已平墳墓生
荆棘狐兔穴其中游童牧豎躑躅其足而歌其上曰孟嘗君
之尊貴亦猶若是乎於是孟嘗君喟然大息涕淚交曉而未
下雍門周引琴而鼓之徐動宮徵卽角羽終而成曲孟嘗君
遂歔歔而就之曰先生鼓琴令文立聽若亡國之人也按新
論遺文見於各書者莫古於此節亦莫詳於此節而未標琴
道篇名今先綜緝本書注所引琴道各條而殿以此節證其
同異校若列眉矣故於各卷注下不復散贅至本書注有引
琴道而非雍門周事者又凡十三見別詳蕪城賦注下亦有

引新論而不標篇名然皆與琴事相涉疑亦琴道中語者凡四見別詳月賦注下

校鳴篴 顧氏千里曰案此篴字卽从竹之假借从竹之篴說文所無也孫氏志祖謂篴誤篴非矣姜氏皐曰玉篇亦無篴字而箛字注云卷篴葉吹之廣韻篴篴蘆也箛捲蘆葉吹之也則篴之爲箛其義已見

注漢書曰有淮南鼓員 曰字不當有各本皆衍

感河馮

注

莊子曰馮夷得道以潛大川 姜氏皐曰竹書洛伯

與河伯用馮夷門後漢書張衡注馮夷服八石得水仙爲河伯故曰河馮按馮夷之名傳記所載各異本書思元賦注引書傳曰姓馮名夷又引太公金匱曰姓馮名修穆天子傳稱無夷山海經稱水夷淮南子原道訓注稱馮遲後漢書張衡

傳注又引龍魚河圖云河伯姓呂名公子夫人姓馮名夷而
所引聖賢冢墓記及莊子大宗師篇釋文引清冷傳並云華
陰潼鄉隄首里人鑿鑿有據其信有之歟

注相貝經曰 張氏雲璈曰相貝經嚴助撰見初學記

布九畿 段校云賦文本是緘字後人因詩改之

注國語里革曰豈禁里麗 豈字不當有胡公攷異曰此蓋有

依國語記豈字於里旁者而誤添在禁上也

注說文曰魛捕魚也 今說文魛作漁在魚部姜氏臯曰卽周

禮獻人之省華嚴經音義云聲類有獻魛二體

大駕幸乎平樂張甲乙而襲翠被 六臣本平樂下冬之館二

字張作帳

注李尤樂觀賦曰 樂上當有平字各本皆脫

烏獲扛鼎

段校云正文作舡故注引說文而曰舡與扛同魏

大饗碑舡鼎緣撞舡舡同也

注

說文曰扛橫開對舉也

今說文開作闕此誤

注

熊豹熊虎

熊當作龍各本皆誤

擊清暢而蛟蛇

洪氏邁容齋五筆云委蛇字凡十二變一曰

委蛇二曰委佗三曰透迤四曰倭遲五曰倭夷六曰威夷七

曰委移八曰透移九曰透迤十曰蛟蛇十一曰邁迤十二曰

威遲按吳玉搢金石存歷舉衛尉卿衡方碑作禕隋唐扶碑

作透迤劉熊碑作委迤枚乘兔園賦作委移博雅賦陝險也

文選薛注周道威夷險也則陝陝亦委蛇之別體而字書尚

有蛟迤隄倚之異是此二字固不止十二變矣

注

襪衣毛形也

衣當作襪各本皆誤

度曲未終

注

班固漢書曰元帝自度曲

嚴氏有翼藝苑雌黃

云世言度曲者謂歌曲也兩京賦度曲未終杜詩翠眉縈度曲皆當作徒故切若元帝自度曲應劭注自隱度作新曲師古注度音大各切其義自別

複陸重閣

六臣本複作覆何曰陸當作陞朱氏琯曰複陸注

釋爲複道陞則階級之名陸字未必誤

礚礚激而增響礚礚象乎天威

注

增響重聲也

六臣本響作

音礚作礚尤本重誤作委

是爲曼延

六臣本曼作蔓按曼延卽曼衍作蔓無據

垂鼻麟囷

五臣囷作輶良注可證

海鱗變而成龍

余曰漢官典職正旦御陽德殿作九賓樂舍

利從東來戲於庭入殿前激水化成比目魚跳躍激水作霧

化成黃龍高八十丈出水戲於庭以兩大絲纏繫兩頭中間相去數丈兩倡女對舞行於繩上道逢切肩不傾又踏踟躕身藏形於斗中鐘磬晉唱樂畢作魚龍曼延黃門吹三匹驪駕四鹿胡公攷異曰驪當作麗薛注驪猶羅列馴駕之也驪亦當作麗惟薛正文作麗故如此注之若作驪不可通善必與薛同濟注云仍以驪馬駕之則是五臣作驪耳

畫地成川 余曰漢武故事未央庭中設角抵戲三百里內觀其雲雨雷電無異於真畫地爲川聚石成山

盤樂極

注

孟子曰盤游飲酒馳騁田獵 今孟子作般樂飲酒

驅騁田獵

微行要屈 濟注行出不法駕謂之要自上雜下謂之屈按此語不知所本漢書揚雄傳河東賦有萬騎屈橋句顏注屈橋

壯健貌屈音其勿反橋音其名反與要屈二字義恰相反
便旋閭閻 錢氏大昕潛研堂集三十一云廣雅釋訓便旋徘徊也張平子西京賦便旋閭閻薛注云盤桓便旋也盤與徘徊與徊皆聲之轉文異而義不殊按此句下無薛注見上文
奎踞盤桓句下

注掖庭今官 陳校今改令是也各本皆誤

促中堂之陜坐 六臣本陜作狹

妖蠱艷夫夏姬 注音古 六臣本蠱音也按蠱蓋與治通南都

賦侍者蠱媚五臣作治媚桂氏馥札樸云易治容誨淫太平
廣記引作蠱容一切經音義云聲類蠱弋者反周易作治治
容誨姪劉瓛曰治妖治也

增嬋娟以此豢 又若驚鶴之羣罷 五臣此作趾罷作羣濟注

可證楊氏慎丹鉛總錄云曾見化類書引此豸作猗靡羣羆作羣起豸注音雉猶近似羆字音義不可強合起字是也孫氏志祖曰之字當作與亦據濟注爲說耳

振朱屣於盤樽 五臣朱屣作珠履銑注可證

昭藐流盼 五臣藐作邈銑注可證丹鉛總錄云詩猗差名兮玉篇引各作覲眉目之間也字从冥見言美人眉目流盼使人冥迷也昭覲同

誰能不營 注說文曰營惑也 營當作營今說文目部營惑也

李即引此今各本皆誤作營遂以爲說文無此訓矣漢書敘傳下集注引鄧展又曰氏春秋尊師篇注淮南子原道訓注精神訓注引並作營誤與此同

逞志究欲窮身極娛 六臣本志作至身作歡

鑒戒唐詩他人是媮 毛詩山有樞他人是愉傳云愉樂也箋
云愉讀愉愉取也按說文愉薄也桃愉也詩鹿鳴篇示民不
桃傳云桃愉也釋文云愉他侯反又音踰是愉與愉本屬一
字而國語晉語媮以幸賈山至言媮合從容又皆以媮爲愉
則愉與媮愉三字並可通特訓樂與訓薄義異耳漢書地理
志下引詩它人是媮與此賦合蓋三家說也

注君作故事 事字不當有各本皆衍

許趙氏以無上 六臣本以作之

注論語無爲而治其舜也歟 今論語治下有者字歟作與
傳聞於未聞之者 六臣本者作口

曾髣髴其若夢

注

說文曰彷彿相似見不諦也 髣髴彷彿並

當作仿佛今說文人部仿相似也佛見不審也繫傳作見不

謚也本書甘泉賦注魯靈光殿賦注並引作仿佛相似視不
謚也海賦注引作彷彿見不審也惟悼亡詩注引與此同甘
泉賦注云謚卽諦字魯靈光殿賦注云謚與諦同

^注論語曰舉一隅而示之 今論語無下三字皇侃義疏本高
麗國集解本並有日本山井鼎七經攷異云足利本作示之
無而字晁公武蜀石經攷異云舉一隅下有而示之三字與
李鶚本不同知古本論語皆如是也

此何與於殷人屢遷前八而後五 六臣本與作異書序自契
至於成湯八遷湯始居亳從先王居作帝告盭沃疏云商頌
云帝立于生商是契居商也世本云昭明居砥石左傳稱相
土居商邱及今湯居亳事見經傳者有此四遷其餘未聞按
竹書載夏少康十一年使商侯冥治河至帝將十三年商侯

冥死於河中間計三十四年魯語及祭法所謂冥勤其官而
水死者冥爲相土之曾孫計此時必離商卽往河治水也竹
書又載帝芒三十三年商侯遷於殷此殷侯卽冥之子振字
子亥實始遷殷計居殷三十七年而爲有易之君綿臣所殺
國統幾絕振生微字上甲乃殺綿臣而以殷興仍居殷地竹
書所載帝泄十六年殷侯微以河伯之師伐有易殺其君綿
臣是也至竹書又載帝孔甲九年殷侯復歸於商卽此殷侯
不知何名蓋上距微殺綿臣之歲凡一百有三年自歸商卽
之後又二十五年則爲桀在位之十五年實成湯爲商侯之
元年竹書所載帝癸十五年商侯履遷於亳是也統前計之
契始居商一也昭明居砥石二也相土居商卽三也冥治河
四也子亥遷殷五也孔甲之時復歸商卽六也湯遷亳七也

然古今相傳皆謂偃師穀熟皆湯所都而景亳則湯會諸侯之處是爲三亳皇甫謐謂南亳爲穀熟北亳爲蒙蒙卽景亳與穀熟相近西亳爲偃師果湯會都二亳則適合八遷之數惟二亳遷居之前後經傳無文嚴粲謂湯自南亳遷西亳似爲可信蓋三亳中南亳北亳相去最近竹書旣載湯於桀十五年遷亳又載二十八年昆吾氏伐商商會諸侯於景亳是景亳實在商封內否則國旣被伐何得越境以會諸侯湯始遷之亳旣與蒙相近則再遷之亳其在偃師無疑而皇甫謐乃疑水經注引闕駟言湯都偃師云云爲失實今卽以書序證之序言從先王居孔安國以先王爲帝嚳按書篇名曰帝告釐沃告當通作嚳釐之言來蓋謂從帝嚳而來居於沃土耳水經注言帝嚳之墟在禹貢豫州河雒間今河南偃師城

西二十里戶鄉亭是也使湯不都偃師何得云從先王居乎
然則成湯以前六遷成湯兩遷合爲八遷書序固不差也惟
梁氏玉繩史記志疑又以水經注十九引世本云契居蕃爲
遷之一并湯爲八也其說亦通至書盤庚於今五邦疏引鄭
康成說謂湯自商徙亳數商亳鄩相耿爲五釋文載馬融說
同然湯居商邱特沿上代之舊不得謂之遷孔傳不數商邱
而數盤庚是未遷時作豈得逆數遷殷爲五此賦明言前八
後五今旣以成湯兩遷屬前則後五不應復數成湯以竹書
攷之自成湯之後歷外丙仲壬太甲沃丁太庚小甲雍已太
戊八君皆仍居亳至仲丁始遷於囂歷外壬而河亶甲自囂
遷於相繼之祖乙元年自相遷於耿二年圮於耿自耿遷于
庇歷祖辛沃甲祖丁皆居庇及南庚三年遷於奄歷陽甲而

盤庚至十四年乃自奄遷於北蒙曰殷是於今五邦當合摶相耿庇奄而言且此賦下乃言盤庚作誥則後五之不應數盤庚愈明矣

注 尙書曰自契至成湯八遷尙書序曰盤庚五遷 尙書下當

添序字尙書序曰當作又曰各本皆有脫誤

注 盤庚遷於殷 陳曰盤上脫尙書曰三字按所校非也此李

注述書意耳若以爲引書詞則不應云殷人弗適有居也

注 漢書注曰齷齪 胡公攷異曰大臣本漢上有善曰二字是

也或連上作薛注誤